

Billet, Justus. "Den Polytye Boeck, ... Beginnende Den 22sten Augusto in Tjaer Ons Heeren 1658 (1658-1668) Deel 8." 3. Gent, 1668. Stadsarchief Gent, Bibliotheek 1LF2 en IGDI, 529 (C. Handschriften) fol. 39r. en 39v.

Saterdag den 18^{en} dito 1665, soo waeren hier brieven van
Bruijsel met advijs dat aldaer op Vrijdach 17^{en} dito 1665
gheexecuteert was met de coorde den vermaerden straetschender,
ende roover gheseijt Petiet Joan, die veel quaets (met sijn
gheselschaep) in Vlaenderen, Brabant, ende henegauwe,
Midtsgaeders in de Landen van Naemen Limburch,
Lutcenburch ende Luijck soo wel op hadde ghedaen,
Ja selve was soo onbedacht in Civiel¹ en staut² gheweest
dat hij wel hadde dorven (met hulpe van sijn complicen)
doen arretteren de Carosse ende het ghevolch vande Hertoch
van Arembergher ende Archoodt³, ende sonder eenich
respect te draeghen an sijnen persoon, ende an sijn compaignie hem te doen gheven
al het Ghelt dat hij bij hem hadde
Ende boven dien dede uijt de Carosse nemen met audace, ende
spijtighe worden⁴ al dat hem beliefte dusdanighe volerijen,
plunderinghen ofte rooverije heeft hij met menichte
ghedaen ofte doen doen, sonder datmen ghehoort heeft dat
hij eenighe Moorden heeft ghecomitteert, ofte doen committeren. Om dat hij soo lanck
ende groot was van
Postuere, soo wiert hij gheheeten *Par mot de guerre*
Petit Joan in alle de voornomde, Landen maer al te wel
bekent.

¹ Inciviel: onbeschaafd.

² Stoutmoedig, brutaal.

³ Dit moet Aarschot zijn.

⁴ Woorden.